


林文忠公政書

使粵奏稿上

乙集卷一、二、三、四



柳田文庫
文庫11
D 327
5



文庫11
D 327
5



柳田泉文庫

48-12/39

010190567228

恭報抵粵日期摺

奏為恭報微臣行抵廣東日期並遵

旨體察洋面堵截情形恭摺奏祈

聖鑒事竊臣上年冬間進京

陛見於十一月十五日欽奉

諭旨著頒給欽差大臣關防馳驛前往廣東查辦海

口事件所有該省水師兼歸節制等因欽此臣當

卽在京請

訓疊聆

林文忠公政書

一集 使粵奏稿



恩諭備極周詳蒙

委任之逾恆彌深感奮念責成之重大倍切悚惶

陛辭後於二十三日出京經由直隸山東安徽皆無
停滯惟江西途次連遇大雪閒有未能償行之
處旋即加緊前進以速補遲茲於正月二十五
日行抵廣東省城與督臣鄧廷楨撫臣怡良等
會晤當據告知節次掣獲鴉片煙犯水陸交嚴
羣情頗爲警動追聞

特派查辦之

旨聲威所被震懾民夷是以駐省年久之夷商渣噸
於十二月十二日請牌下澳附搭港腳映船回
國其伶仃洋躉船內有港腳噤船及嚙吐船二
隻亦於十二月二十八日回去今年正月二十
日又有港腳噤啞及吡噸等船咪咧啞國噪哩
啞及吐啞等船噍國嚙吐船小呂宋船共十四
隻起碇開行二十一日又有港腳噴啞等船咪
咧啞國嘛叻等船共四隻與前船一同駛去旋
據探報拋泊了洲洋面該處爲夷船回國必經

之路現仍嚴行探逐業經先後具

奏等語

臣

復細加查訪均屬相符惟思夷情詭譎

異常現有鴉片在船未必遽甘回國果否計窮
思遁抑係擇地圖遷均未可定第既經開動其
為畏憚可知亟應宣示

天威乘勢盡行驅逐以為清源之計除飭外海水師
確查飛稟相機會辦外至臣先於途次承准軍
機大臣字寄上年十二月十六日奉

上諭本日據鄧廷楨奏籌調師船將備聯幫駐泊洋

面堵截民夷售私並水陸交嚴以除錮弊一摺著
林則徐馳抵廣東後即將各該處情形悉心體察
所有摺內所議駐洋守堵各事宜會同鄧廷楨通
計熟籌務臻妥善嚴實辦理原摺著鈔給閱看將
此諭令知之欽此臣查閱摺內所議分派兵哨各
船在伶仃洋一帶按月輪流堵截無論內地何
項船隻駛近夷船概行追擊倘敢逞兇拒捕格
殺勿論其東路之惠潮等屬洋面口岸一體巡
防似此碁布星羅已足以昭嚴密惟現在夷薹

既經移動自須到處跟蹤即使該躉船駛出老
萬山猶恐內海匪船潛赴外洋勾結是杜絕售
私之勁實屬刻不容鬆臣甫經到省於各處島
澳口門尙未親歷現在檢閱圖志先與督撫臣
在省互相講求擬於旬日之間出赴中路之虎
門澳門等處與水師提臣關天培乘船周覽以
便相機度勢通計熟籌俟躉船驅除應手之後
再往東路察看機宜隨時會同鄧廷楨等覈實
辦理總期拔本塞源力迴錮習以仰副

聖主澄清海澨綏戢民生之至意所有微臣到粵日
期並體察大概情形謹先繕摺具

奏伏乞

皇上聖鑒再廣東陽雨應時米糧平減民情均極安

帖足以上慰

聖懷合併陳明謹

奏

聖訓合...
 皇土聖恩...
 大...
 朕並...
 聖主...

附奏粵省鴉片情形片

再查奸夷喧嘩係啖咭喇國所屬之港脚人盤踞粵省夷館歷二十年之久混號鐵頭老鼠與漢奸積慣串通鴉片之到處流行實以該夷人為禍首伊僅係夷中之一奸販並非該國有職之人祇以狡黠性成轉恃

天朝柔遠之經為伊護符之計其因售私以致巨富人
 人所共知道光十六年冬間即經督臣鄧廷楨等遵奉

林文忠公政書

乙集

使粵奏稿

五

諭旨查明驅逐而該夷藉稱清理帳目又作兩載逗
遛去冬臣蒙

皇上發交太僕寺少卿楊殿邦等條奏各摺帶來廣
東查辦其摺內所指亦以該夷人爲奸猾之尤
臣於未出京時卽先密遣捷足飛信赴粵查訪
其人以觀動靜聞十二月間廣東省城互相傳
播以爲

欽差大臣一到首挈渣頓究辦該夷人遂卽請牌下
澳搭船回國是其飽則颺去固爲鬼蜮常情要

在使之不敢再來乃爲善策又伶仃洋面躉船
亦於臣將到之時先後開動二十隻雖夷情叵
測難保不游奕往來而其聞知

諭旨森嚴心懷畏懼亦已明甚矣此時查辦機宜惟
有外樹聲威內加慎重陽示鎮靜陰肅防維使
之生嚴憚之心而發悔懼之念然後曉諭禁止
皆非空言至廣東與販吸食之人固倍蓰於他
省然聞

皇上特遣大臣查辦皆有懼心屢經嚴挈之餘與販

者不能不斂戢吸食者亦不能不戒斷惟民情
因見從前旋查旋止以為官禁未必久長不免
有觀望希冀之想臣入境後聞民間無不私探
罪名輕重與新例之會否頒行大抵惟生死關
頭足以生其震恐如果定論死之例而寬一年
之期即吸食莫多於廣東而以臣察看情形亦
可保限外無人羅法若寬而生玩則不惟未戒
者不戒即已戒者亦必復食稍縱即逝恐不可
挽伏乞

聖明乾斷嚴例早頒庶辦理得有把握臣愚昧之見
是否有當謹附片瀝陳伏祈

聖鑒謹

奏

會奏夷人躉船鴉片盡數呈繳摺

奏為啖咭喇國夷人震懾

天威將躉船鴉片盡數呈繳現於虎門海口會同驗

收恭摺奏

聞仰祈

聖鑒事竊照鴉片來自外洋毒流中國蔓延既久幾
於莫可挽回幸蒙我

皇上渙號大宣

乾綱獨斷力除錮弊法在必行且荷

林文忠公政書

乙集

使粵奏稿

八

特頒欽差大臣關防派臣林則徐來粵查辦顧茲重大之任慮非閭陋所勝仰賴

諭旨嚴明

德威振疊不獨禁令行於內地且使風聲播及重洋

復蒙

諭令臣鄧廷楨等益矢奮勤盡泯畛域下懷欽感倍

思併力驅除在臣林則徐未到之先已將窩口

煙館與販吸食各犯拏獲數百起分別懲辦又

派令各師船輪流守堵水陸交嚴並將東路夷

船及住省奸夷先後驅逐節經奏蒙

聖鑒臣林則徐於正月二十五日到省亦將會商籌

辦大概情形先行具

奏在案維時在洋躉船二十二隻已陸續起旋開

行作為欲歸之勢若但以逐回夷界即為了事

原屬不難惟臣等密計熟商竊以此次

特遣查辦務在永杜來源不敢僅顧目前因循塞責

查夷情本皆詭譎而販賣鴉片者更為奸猾之

尤此次聞有

欽差到省料知必將該夷躉船發令驅逐故特先行
開動離卻向來所泊之伶仃等洋以明其不敢
違抗其實每船內貯存鴉片聞俱不下千箱因
上年以來各海口處處嚴防難於發賣而其奸
謀詭計仍思乘間覓售非特不肯拋棄大洋亦
必不肯帶回本國即使逐出老萬山以外不過
暫避一時而不久復來終非了局且內海匪船
亦難保不潛赴外洋勾結售買必須將其躉船
鴉片銷除淨盡乃爲杜絕病源但洪濤巨浪之

中未能確有把握因思躉船之存貯雖在外洋
而販賣之奸夷多在省館雖不必遽繩以法要
不可不喻以理而恤以威臣林則徐當撰諭帖
責令衆夷人將躉船所有煙土盡行繳官許以
奏懇

大皇帝天恩免治既往之罪並酌請

賞犒以獎其悔懼之心嗣後不許再將鴉片帶來內
地犯者照

天朝新例治罪貨物沒官等語與臣鄧廷楨怡良酌

商定稿卽於二月初四日公同坐堂傳訊洋商將諭帖發給令其齎赴夷館帶同通事以夷語解譯曉諭立限稟覆一面密派兵役暗設防維查各國買賣以暎咭喇爲較大該國自公司散局以後於道光十六年派有四等職夷人義律到澳門經管商梢謂之領事_臣等發諭之後各國則皆觀望於暎夷而暎夷又皆推諉於義律其中有通曉漢語之夷人瞻等四名經司道暨廣州府等傳至公所面加曉諭因該夷瞻等回

稟之言尙爲恭順當卽賞給紅綬二疋黃酒二壘著令開導衆夷速繳鴉片未據卽行稟覆至二月初十日義律由澳門進省其時奸夷嚙咭等希圖乘夜脫逃_臣等查知截回諭責義律以不能約束之非並照歷屆暎夷違抗卽行封艙之案移咨粵海關監督_臣豫堃將各夷住泊黃埔之貨船暫行封艙停其貿易又夷館之買辦工人每爲夷人潛通信息亦令暫行撤退並將前派暗防之兵役酌量加添凡遠近要隘之

區俱令明爲防守不許夷人出入往來仍密諭
弁兵不得輕舉肇釁在臣等以靜制動意在不
惡而嚴而諸夷懷

德畏

威均已不寒而慄自嚴密防守之後省城夷館與黃
埔澳門及洋面躉船信息絕不相通該夷等疑
慮驚惶自言愧悔臣林則徐又復疊加示諭勸
戒兼施卽於二月十三日據該領事義律稟覆
情愿呈繳鴉片維時距撤退買辦之期業已五

日夷館食物漸形窘乏臣等當卽賞給牲畜等
物二百數十件復向查取鴉片確數經義律向
各夷人名下反覆追究旋據呈明共有二萬二
百八十三箱查向來挈獲鴉片如係外夷原來
之箱每一箱計裝整土四十箇每箇約重三斤
每箱應重一百二十斤卽至日久收乾每箱亦
約在百斤以外以現在報繳箱數覈之總不下
二百數十萬斤若經奸販轉售則流毒何所不
至今設法令其全繳不動兵刑無非仰仗

天威自然畏服臣等欽感之餘仍當倍加慎重誠恐所報尙有不實不盡訪之在洋水師及商賈人等僉稱外夷高大躉船每隻所貯亦不越千箱之數是躉船二十二隻覈與所報箱數不甚相懸當卽諭令駛赴虎門以憑收繳除商明留臣怡良在省彈壓防範外臣林則徐臣鄧廷楨均於二月二十七日自省乘舟二十八日同抵虎門水師提督臣關天培本在虎門駐劄凡防範夷船查拏售私之事皆先與臣等隨時商榷務

合機宜自收繳之諭旣頒尤資嚴密防堵茲躉船二十二隻陸續駛至虎門口外關天培當卽督率將領分帶提標各營兵船排列彈壓並先期調到碣石鎮總兵黃貴署陽江鎮總兵楊登俊各帶該標兵船分排口門內外聲威極壯粵海關監督臣豫堃亦駐虎門稅口照料稽查臣等親率候補知府南雄直隸州知州余保純署廣州府同知佛岡同知劉開域候補通判李敦業樂昌縣知縣吳思樹暨副將李賢守備盧大

鉞分派文武大小各委員隨收隨驗隨運隨貯
惟爲數甚多一躉船所載之箱卽須數十隻剝
船始敷盤運而自口外運至口內堆貯之處又
隔數十里若日期過促草率收繳恐又別滋弊
端臣鄧廷楨擬收至兩三日後先回省署辦公
臣林則徐自當常駐海口會同提臣關天培詳
細驗收經理一切容俟收繳完竣查明實在箱
數與該夷領事所稟有無參差再行恭摺
奏報並取具各夷人永不夾帶切結存案以斷根

株伏思夷人販賣鴉片多年本干

天朝法紀若照名例所載化外有犯並依律科斷之
語卽予以正法亦屬罪所應得惟念從前該夷
遠隔重洋未及遽知嚴禁今旣遵諭全繳躉船
鴉片卽與自首無異合無仰求

皇上覆載寬宏

恩施法外免追旣往嚴儆將來並求

俯念各夷人鴉片起空無貲置貨酌量

加恩賞給茶葉凡夷人名下繳出鴉片一箱者酌賞

茶葉五斤以獎其恭順畏法之心而堅其改悔自新之念如蒙

恩准所需茶葉十餘萬斤應由臣等捐辦不敢開銷至夷人呈繳鴉片如此之多事屬創見自應派委文武大員將原箱解京驗明再行燒燬以徵實在是否有當臣等謹會同水師提督臣關天培粵海關監督臣豫堃合詞恭摺具

奏並錄諭夷原稿并夷稟二件恭呈

御覽伏乞

皇上聖鑒再此次距臣林則徐到省拜摺之後已閱

一月先因籌辦未卽就緒不敢遽行奏

聞惟事經多日恐塵

聖懷茲謹由四百里馳奏合併聲明謹

奏

皇土聖慈再此大我
 臣林則徐謹將各國夷商呈繳鴉片取具
 永不販賣甘結論稿並嘆咭喇國領事義律兩
 次覆稟敬謹繕錄恭呈
 御覽

附呈諭夷原稿並夷稟二件

謹將 臣 林則徐示諭各國夷商呈繳鴉片取具
 永不販賣甘結論稿並嘆咭喇國領事義律兩
 次覆稟敬謹繕錄恭呈

御覽

諭各國夷人知悉照得夷船到廣通商獲利甚
 厚不論所帶何貨無不全銷欲置何貨無不立
 辦是以從前來船每歲不及數十隻近年來至
 一百數十隻之多我

大皇帝一視同仁准爾貿易爾纔沾得此利倘一封
港爾各國何利可圖況茶葉大黃外夷若不得
此卽無以爲命乃聽爾年年販運出洋絕不靳
惜

恩莫大焉爾等感

恩卽須畏法利已不可害人何得將爾國不食之鴉
片煙帶來內地騙人財而害人命乎查爾等以
此物蠱惑華民已歷數十年所得不義之財不
可勝計此人心所共憤亦天理所難容從前

天朝例禁尙寬各口猶可偷漏今

大皇帝聞而震怒必盡除之而後已所有內地人民
販鴉片開煙館者立卽正法吸食者亦議死罪
爾等來至

天朝地方卽應與內地民人同遵法度本大臣家居
閩海於外夷一切伎倆早皆深悉其詳是以特
蒙

大皇帝頒給平定外域屢次立功之

欽差大臣關防前來查辦若追究該夷人積年販賣

之罪卽已不可姑容惟念究係遠人從前尙未知有此嚴禁今與明申約法不忍不教而誅查爾等現泊伶仃等洋之躉船存貯鴉片甚多意欲私行售賣獨不思海口如此嚴拏豈復有人敢爲護送而各省亦皆嚴拏更有何處敢與銷售此時鴉片禁止不行人人知爲鴆毒何苦貯在夷躉久椹大洋不獨徒費工費恐風火更不可測也合行諭飭諭到該夷商等速卽遵照將躉船鴉片盡數繳官由洋商查明共繳若干箱

造具清冊呈官點驗收明燬化以絕其害不得絲毫藏匿一面出具夷字漢字合同甘結聲明嗣後來船永遠不敢夾帶鴉片如有帶來一經查出貨盡沒官人卽正法字樣聞該夷平日重一信字果如本大臣所諭已來者盡數呈繳未來者斷絕不來是能悔罪畏刑尙可不追既往本大臣卽當會同督撫兩院奏懇

大皇帝格外施恩不特寬免前愆並請酌予賞犒以獎其悔懼之心此後照常貿易旣不失爲良

夷且正經買賣正可獲利致富豈不體面倘執
逃不悟猶思捏稟售私或託名水手帶來與爾
無涉或詭稱帶回該國投入海中或乘閒而赴
他省覓售或搪塞而繳十之一二是皆有心違
抗怙惡不悛雖以

天朝柔遠綏懷亦不能任其藐玩應卽遵照新例一
體從重懲創此次本大臣自京面承

聖諭法在必行且旣帶此關防得以便宜行事非尋
常查辦他務可比若鴉片一日未絕本大臣一

日不回誓與此事相始終斷無中止之理況察
看內地民情皆動公憤倘該夷不知改悔惟利
是圖非但水陸官兵軍威壯盛卽號召民間丁
壯已足制其命而有餘而且暫則封船久則封
港更何難絕其交通我中原數萬里版輿百產
豐盈並不藉資夷貨恐爾各國生計從此休矣
爾等遠出經商豈尙不知勞逸之殊形與衆寡
之異勢哉至夷館中慣販鴉片之奸夷本大臣
早已備記其名而不賣鴉片之良夷亦不可不

為剖白有能指出奸夷責令呈繳鴉片並首先具結者即是良夷本大臣必先優加獎賞禍福榮辱唯其自取今令洋商伍紹榮等到館開導限三日內回稟一面取具切實甘結聽候會同督撫示期收繳毋得觀望諉延後悔無及特諭附錄義律兩次覆稟

暎咭喇國領事義律具稟

欽差大人為恭敬遵諭稟覆事轉奉鈞諭

大皇帝特命示令遠職即將本暎國人等經手之鴉

片悉數清繳一俟大人派委官憲立即呈送如

數查收也義律一奉此諭不得不遵自必刻即

認真一體順照緣此恭惟稟請明示現今裝載

鴉片之暎國各船應赴何處繳出至所載鴉片

若干繕寫清單求俟遠職一經查明當即呈閱

也謹此稟赴大人臺前查察施行

暎咭喇國領事義律敬稟

欽差大人為遵諭呈單事昨因謹奉大人鈞諭即經

遠職持掌國主所賜權柄示令本國人等即將

映咭喇人所有之鴉片如數繳送

遠職

查明所呈共有二萬零二百八十三箱恭

候明示查收緣此謹稟赴大人臺前查察施行

附奏夷人現繳鴉片請暫緩斷絕茶葉大黃片
再_臣等先後承准軍機大臣字寄道光十九年

正月初九日奉

上諭本日據鄧廷楨怡良片奏查辦粵省鴉片煙情
形朕詳加披閱具見肫誠爲國之心惟當此可乘
之機仍應督飭文武員弁趁勢嚴拏毋稍鬆懈務
使根株淨盡錮弊全除林則徐計應早晚到粵該
督等仍遵前旨協力同心盡泯畛域勉之又勉以
副委任至林則徐前此面奏請頒發檄諭曉示外

夷著與鄧廷楨酌商是否可行儻必須頒發著卽
妥擬底稿具奏經朕披覽再行檄發等因欽此又

正月二十七日奉

上諭據鄧廷楨等奏通諭各國夷商湔除舊汙並繕
錄諭稿進呈朕詳加披閱措詞正大所見亦屬周
到現在外洋拋泊各躉船是否盡數回國其並非
躉船又非進口貨船往來各洋寄棧者能否絕迹
著林則徐會同該督等嚴飭水師各鎮協營調集
師船在各洋面聯幫追捕毋任再有偷漏其窩口

煙館各犯並著通飭各屬搜拏淨盡以絕根株其
茶葉大黃果否為該夷所必需倘欲斷絕是否堪
以禁止不至偷越之處並著悉心訪察據實具奏
林則徐面奏請頒發各國檄諭著仍遵前旨與鄧
廷楨商酌妥擬底稿具奏經朕披覽再行頒發將
此諭令知之欽此查外洋拋泊各躉船已據遵諭
呈繳煙土現經臣等恭摺具

奏其並非躉船又非進口貨船往來各洋寄棧者
以東路南澳鎮屬洋而為較多先經臣鄧廷楨

檄飭該鎮會同潮州道府設法防堵業將停泊
舢板夷船八隻驅逐開行於上年十二月二十
七日

奏明在案今春以來復據該鎮先後稟報偶有夷
船駛至長山尾大金門等洋遊奕亦經舟師實
力驅逐全數駛出夷洋此等夷船聞知煙土盡
數繳官無所希冀似可不致再來臣等仍檄飭
該鎮聯幫堵截以絕覬覦並飭潮州道府嚴查
海口以杜偷漏期於粵洋一律肅清其內地窩

口煙館各犯除照舊嚴密查拏外現在民間畏
懼改悔多有願將舊存煙土煙槍等物赴官呈
繳者當於省城分設官局派員驗收並經本省
紳士隨處設局分投勸諭旬餘以來陸續呈繳
甚為踴躍容俟收有成數另行

奏報至茶葉大黃兩項臣等悉心訪察實為外夷
所必需且夷商購買出洋分售各路島夷獲利
尤厚果能悉行斷絕固可制死命而收利權惟
現在各國夷商業經遵諭呈繳煙土自應仰乞

天恩准其照常互市以示懷柔所有斷絕茶葉大黃
似可暫緩置議如果該夷經此次查辦之後仍
敢故智復萌希圖夾帶鴉片入口彼時自當嚴
行禁斷並設法嚴查偷越弊端應請於善後章
程內另行籌議具奏至_臣林則徐面奏請頒外
夷檄諭一節原擬抵粵後與_臣鄧廷楨悉心商
酌如須頒發自應先擬底稿進呈恭候
訓示嗣思啖咭喇國既有在粵之領事義律及住省
夷人不如就近諭知飭將鴉片悉數繳官躉船

迅速回國現已辦理應手則檄諭該國之處似
可暫緩頒行俟將來奉到部頒罪名新例暨議
定善後章程一併彙同備文照會仍遵節次

諭旨妥擬底稿恭呈

御覽再行頒發所有_臣等欽奉

上諭據實覆陳緣由謹附片奏祈

聖鑒謹

奏

會奏收繳鴉片已逾十分之八即乘勢清理東

路摺

奏為虎門收繳夷船鴉片已逾十分之八即可乘

勢清理東路恭摺奏祈

聖鑒事竊臣林則徐抵粵以後與臣鄧廷楨暨撫臣

怡良共同商酌責令夷人將躉船煙土悉數呈

繳由臣林則徐疊加示諭勸戒兼施旋據叻咭

喇國領事義律稟明情愿將各船存貯鴉片二

萬二百八十三箱陸續駛至虎門呈繳臣林則

徐_臣鄧廷楨卽於二月二十七日自省起程於二十八日駛抵虎門會同_臣關天培督率文武委員分船收繳業於二月二十九日由四百里恭摺馳

奏在案惟收繳煙土須將剝船攏近躉船方能盤運而剝船與躉船高下懸殊或用梯升或用繩繩登降已形費力迨起至一半之後躉船水迹浮高須防風浪又必下石壓艙且潮汐時有往來風信兼多順逆一遇風潮相薄剝船不能駛

傍夷船卽勉強攏近而兩相撞擊損壞堪虞不得不暫爲停止時當三月風暴正多竟不免有終日坐守之事_臣等同駐海口時刻督催得起卽起不任延緩查各躉船所貯煙土在正艙者皆係番木板箱並用生牛皮封裹極爲堅固其在邊艙者間用口袋裝盛包紮亦甚嚴緊查因板箱多占地位勻擺不開故有改裝口袋者衡以斤兩亦無二致_臣等始悟直隸挈獲金廣興商船鴉片案內所起口袋卽係外夷原物也茲

自二月二十九日收起截至三月二十日計已
收繳鴉片一萬五千八百八十九箱又一千五
百四十七口袋覈之義律原報數目已逾十分
之八惟近數日來察看後船煙土較諸在先收
繳之船所載漸少雖一時未卽收完而覈計大
數恐其或有短欠當又派員持諭前赴省城夷
樓向領事義律嚴加詰責卽據稟覆伊所報數
目係在省樓覈算帳據而各船裝載鴉片開有
駛往沿海地方如潮州南澳等處者遠職再行

催回不論現泊何方半月內想可催到定必如
數盡繳斷不敢短少等語察其情詞似非虛誑
當卽准限半月責令迅速發諭往催臣等伏思
東路南澳地方屢有夷船駛至自上年驅逐淨
盡之後今春仍間有數船至長山尾等洋游奕
雖經該鎮隨時驅逐而夷船旋去旋來是否中
路分銷抑係外洋另股悉心訪察冀得端倪惟
夷人旣不肯輸情衆口亦茫無確據正思俟中
路呈繳事竣再行查辦南澳一隅以冀斷絕根

株不使稍留餘孽今據義律於無心中自行吐露是中東兩路實屬一氣相生其躉船雖在伶仃等洋而三板等船分載煙土由外洋駛往南澳覓售誠爲事所必有既經逐層澈究斧鑿相尋正當乘此機關責成該領事將分往南澳各船一概招回悉數呈繳不但原報二萬餘箱之內不准短少一箱如此外尚有多餘亦必儘數收繳總期一律淨盡不任稍有留遺轉不責其原報失實之咎除俟收繳全完另行

奏結外所有現繳鴉片已逾十分之八並乘勢清

理東路緣由謹會同廣東巡撫臣怡良粵海關

監督臣豫堃恭摺由驛馳

奏伏祈

皇上聖鑒訓示再臣鄧廷楨原擬收至兩三日後先

回省署辦公嗣因督率委員起剝堆貯稽查偷漏弊端未克分身回省茲收繳已有成數卽於拜摺後馳回省垣清釐應辦事宜并督飭嚴拏陸路囤販吸食煙犯合併聲明謹

奏

臣等查該商渣頓實已回國現查夥黨一併驅逐片
再臣承准軍機大臣字寄道光十九年正月二
十七日奉 上諭本日據鄧廷楨怡良奏稱論逐港脚夷商渣頓
現在下澳附船回國等語該夷渣頓來粵貿易多
年所有躉船鴉片多半係其經營實為奸夷渠魁
現因稽查嚴密恐懼圖歸雖據該督等奏稱該夷
請牌下澳於臘月底定可開行但該夷盤踞既久
黨羽必多現在各躉船尚未回帆其所存煙泥豈

覆奏夷商渣頓實已回國現查夥黨一併驅逐片
再臣承准軍機大臣字寄道光十九年正月二

十七日奉

上諭本日據鄧廷楨怡良奏稱論逐港脚夷商渣頓
現在下澳附船回國等語該夷渣頓來粵貿易多
年所有躉船鴉片多半係其經營實為奸夷渠魁
現因稽查嚴密恐懼圖歸雖據該督等奏稱該夷
請牌下澳於臘月底定可開行但該夷盤踞既久
黨羽必多現在各躉船尚未回帆其所存煙泥豈

林文忠公正書 乙集 使粵奏稿

五

肯卽行拋棄難保不別肆詭謀著林則徐嚴密訪查該夷渣頓是否實已下澳開行確於何日起旋如尙在逗遛卽著嚴行驅逐據實覆奏務使奸夷盡去錮弊悉除方爲不負委任將此諭令知之欽此臣查該夷渣頓於上年十二月十二日請牌下澳附搭港脚映船回國業經臣於

奏報到粵摺內查明聲敘在案茲復欽奉

諭旨著臣嚴密訪查當卽欽遵密咨粵海關監督臣

豫堃諭飭洋商伍紹榮等確切查稟並札澳門

同知轉諭在澳之西洋夷目唛嚟哆查明渣頓實係何日自省到澳附搭何船於何日由澳開行回國據實稟覆一面暗遣妥人改裝前赴澳門密加訪問去後嗣准豫堃咨據署澳門同知蔣立昂轉據唛嚟哆稟覆渣頓於上年十二月十三日由省到澳卽於十六日由澳附搭港脚映船開行回國又據洋商伍紹榮等稟同前情與臣遣人赴澳密查均屬相符是渣頓實已於上年十二月間搭船回國並未在省在澳逗遛

毫無疑義惟該夷販賣鴉片來粵多年誠如

聖諭盤踞既久黨羽必多所存煙泥豈肯卽行拋棄

臣先經訪得現住省城義和行之映噸卽係渣

噸之弟又映呀咂啞正呀咂啞皆渣噸之外甥

並有代伊管帳之呀咂啞亦在該行居住是該

夷雖去而買賣帳目仍有人代爲經理此次義

律稟繳鴉片雖係籠統開報並未分析某夷名

下若干而躉船船戶僉稱渣噸居其大股是該

夷存積之煙不至另有囤貯臣與督臣鄧廷楨

面商渣噸既已逃回務當使之永不敵來方爲

善策此時煙土雖已收繳其夥黨亦必驅除如

映噸映呀咂啞正呀咂啞呀咂啞之類現皆給

諭洋商令與向賣鴉片著名之夷人噸咂等一

併驅逐回國庶可杜絕奸夷蹤迹免致勾結盤

踞誘惑內地良民復貽地方之害所有遵查渣

噸實已回國現在查明夥黨一併驅逐緣由謹

附片覆

奏伏乞

聖鑒謹

奏

會奏夷船呈繳鴉片一律收清摺

奏為夷船呈繳鴉片現已一律收清覈較原稟之數有贏無絀恭摺

奏報仰祈

聖鑒事竊照暎咭喇等國夷人遵諭呈繳躉船鴉片

經臣等由四百里會摺馳

奏迨收逾十分之八即乘勢清理東路亦經續行

奏明在案臣等查粵省東路南澳一帶係與福建

漳州府屬洋面毗連該處夷船自上年驅逐開

行之後今春又據稟報有數隻駛至長山尾等洋游奕而福建之布袋等洋近在其北聞亦有夷船旋去旋來緣兩省交界之間逐於粵則竄於閩逐於閩又竄於粵無非因船內載有鴉片隨處覓售茲粵省中路躉船收繳煙土辦理既能應手且究明中東兩路實屬一氣相生亟應由中路而及東路並由粵洋而及閩洋務使兩省海面一體肅清不敢稍分畛域當經_臣等詣諭喚咭喇國領事義律繕寫夷信多撥三板小

船分赴東路各洋無論粵界閩界但有夷船寄泊卽催令駛回中路虎門與各躉船同繳煙土仍嚴檄南澳鎮率領師船在洋堵逐並帶有通事傳諭夷人繳煙其內港各口責令潮州鎮道府縣嚴禁蛋艇出洋以斷夷船接濟一面飛信知會閩省督撫_臣飭屬照辦使兩省聲勢互相聯絡適據潮州府知府易中孚稟知已奉閩浙督_臣鍾祥福建撫_臣魏元烺派委漳州府知府胡興仁至閩粵交界之分水關與易中孚面商

會辦該府等均即遵照檄飭實力防堵水陸交
嚴夷船既不能將鴉片發售又不能有水米接
濟勢難久泊復經該領事義律催令一體呈繳
即據稟報陸續來至虎門查有佛囉吐船啤叻
哈船囉船皆稱從南澳駛來共繳鴉片一千六
十七箱又五百一十一袋復有咧船哈噉時船囉
嘛咁吐船皆稱從福建駛來共繳鴉片二千二
百四箱又五十七袋此數船原不在中路伶仃
等洋躉船之內每由外洋潛行竄越蹤迹靡常

今亦招至虎門與躉船一體呈繳截至四月初
六日收清合計前後所收夷人鴉片共一萬九
千一百八十七箱又二千一百一十九袋覈之
義律原稟應繳二萬二百八十三箱之數更溢
收一千袋有零據該領事等僉稱委係盡數繳
官不敢絲毫餘剩臣等於親督收繳之際節經
飭令委員每起盡一船即將各層船底逐一查
驗不任稍有留遺此次收繳全清夷人成本千
餘萬金已成虛擲諒不敢更尋覆轍惟現值南

風司令各國本年貿易夷船正應陸續到粵計自彼國開船尙在數月以前未必遽信

天朝如此嚴禁其歷年來帶鴉片本已習爲故常此次來船恐亦難免惟一時未便卽寘於法仍須責令一併繳官臣等現又嚴諭該領事義律將新來載貨夷船隨到隨查如無鴉片卽具保結請驗倘有夾帶自行首繳免罪如敢朦混隱瞞查出_不許開艙驅逐回國俟奉到部行新例之後卽當擬具檄諭底稿恭呈

御覽照會該國明示限期如屆限再有帶來應遵照大清律例所載化外人有犯並依律科斷之語與華民同照新例一體治罪貨物沒官始可杜其嘗試之念臣等又思華夷雖有分界而海道處處可通卽如閩省各洋南與粵界相連北卽距粵甚遠是否尙有夷船在彼游奕粵省無從知悉除再飛移閩省督撫臣一併乘機查辦外尙恐夾帶鴉片之奸夷慮及到粵勒繳或從外洋徑竄迤北各省寄旋售私前數年本已有此情形

此後尤不能不慮應請

敕下沿海各省一體嚴查時加防範若收繳之令隨
在得行卽竄越之蹤亦永遠可杜矣至內地與
販已久流毒甚深固積之家定必不少一聞夷
船鴉片盡繳正喜奇貨可居雖已力塞其源而
其流尙未有艾總須趁此機會嚴緝痛懲首繳
者許以自新怙惡者寘之重典務在同心協力
自可禁止令行以仰副

聖主造福寰區爲民除害之至意所有夷船鴉片收

繳全清緣由謹會同廣東巡撫臣怡良粵海關

監督臣豫堃恭摺由驛馳

奏伏祈

皇上聖鑒訓示謹

奏

附奏夷人帶鴉片罪名應議專條夾片

再臣林則徐前諭夷人出具甘結聲明嗣後來
船永不敢夾帶鴉片如有帶來一經查出人即
正法貨盡沒官旋據暎咭喇國領事義律稟稱
本國在

天朝貿易恭蒙

大皇帝懷柔歷有二百餘年仰望先教以禁令森嚴
惟本國地方較遠或可姑寬期限自開船後凡
有印度之港脚屬地者給予五月為限暎國本

地者給予十月爲限然後卽以新例遵行則各人無不悉知其有此例倘有來粵者自必遵行也又云凡有諭令之處遠職自應恭遞回國以俾本國大臣呈上國主閱覽自可明知也等語覈其稟詞尙屬恭順惟甘結仍遷延未具近日復經諭催又據稟稱倘不能不取結則喚國人船無奈只得回國等情揆其用意蓋因該國公使司散局悉聽夷商自行經理其中良莠不齊且海道迢遙設或因風阻滯逾期卽難保在路夷

船竟不稍有夾帶一經出結則此後好夷帶有鴉片不但本犯罹於重法卽該領事亦不能置身事外是以心切遲疑尙非敢違法度且查該夷來粵貿易實係利市三倍不惟以該國之貨牟內地之利並以內地之貨牟各國之利蓋海外島夷之國不知名者不啻盈千累百因無力置船辦貨故不能自達於

天朝而如茶葉大黃絲斤之類則無一國不需此物
暎咭喇等國夷商所帶內地貨物非獨本國自

用尤利於分售各國得價倍蓰即使該夷不賣鴉片專作正經貿易而其所謂三倍之利者自在以此度之其斷不肯捨卻廣東馬頭係屬實情所云只得回國者不過憚於具結強顏而出此言未必真心如是即使果因內地法嚴不能帶賣鴉片暫時躲避回國亦於通商大局並無加損查從前每年來船不過數十隻而關稅並不短絀近年多至一百數十隻而鴉片愈以盛行且每船自夷商以至水手總不止於百人合

而計之殊嫌太衆與其多聚奸宄孰若去莠存良卽加慣賣鴉片之渣噸噸咄等本係早經奉旨查逐之人除渣噸已先回國外噸咄現亦驅逐其他類此者正須一併嚴驅並令出具甘結永遠不敢再來方爲正辦論者或恐各夷商因此裹足殊不思利之所在誰不爭趨卽使此國不來彼國豈肯不至縱或一年偶少次年總必加多且聞華民慣見夷商獲利之厚莫不歆羨垂涎以爲內地民人格於定例不准赴各國貿易以

致利藪轉歸外夷此固市井之談不足以言大義然就此察看則其不患無人經商亦已明甚矣所以鴉片之禁不但宜嚴於百姓實可倍嚴於夷商彼終年之間住內地之日甚多在該國之日轉少非獨食毛踐土且皆積聚貲財比之內地民人受

恩更重豈有予之以樂利而不可齊之以政刑者乎況所來貿易之人不過該國之一販戶並非貴戚達官卽鴉片亦皆私帶而來更非受命於其

國主且自道光十四年公司散後一切買賣均與其國主無干此輩奸夷性貪而狡外則桀驁夸飾內實懼怯多疑稍縱卽驕惟嚴乃肅查乾隆年間粵省辦理暎夷洪任輝等控案動卽監禁一三二年無敢違抗歷有成案可稽卽近年奏辦夷案如道光二年之命犯啡可六年之命犯嗎啞喇喇皆引名例化外有犯依律擬斷之條處絞立決夷人無不帖服況鴉片之夾帶彼本自知理短是以臣等此次痛加呵責不但不敢

狡辯並聞退無怨言是外夷亦有天良尙非不可教誨可否仰求

敕部將夷人帶鴉片來內地者應照化外有犯之例人卽正法貨物入官議一專條並暫時首繳免罪如何酌予限期之處奏請

諭旨通行遵辦俾得諭令各國夷人咸使懍遵嗣後自必不敢犯法似亦刑期無刑之意是否有當謹合詞附片瀝陳伏祈

聖鑒謹

奏

覆奏查察虎門排練礮臺摺

奏爲遵

旨查察虎門海口排練礮臺情形恭摺覆

奏仰祈

聖鑒事竊

臣

於三月初七日在虎門舟次承准軍機

大臣字寄二月十六日奉

上諭據鄧廷楨等奏籌議虎門海口創造木排鐵鍊
添置礮臺礮位一摺已降旨允准虎門海口爲粵
海中路咽喉現當籌議海口章程自宜妥爲布置

以密巡防該督等所請於海面安設木排鐵鍊以
羈絆夷船並添設礮臺添置礮位之處是否有益
著林則徐詳細查察情形據實具奏原摺著鈔給
閱看將此諭令知之欽此伏查粵東中路海口以
虎門爲咽喉臣此次親至該處督收夷人鴉片
卽住在水師米艇寄旋海中四面形勢皆可瞭
望當經留心相度竊見重重門戶實屬險要天
成自伶仃大洋過龍穴而北兩山斜峙東曰沙
角西曰大角由此以入內洋是第一重門戶也

進口七里有一山屹立中央名曰橫檔其前有
一巨石俗名飯籬排又其前小山一座曰下橫
檔海道至此分爲三支其右一支多有暗沙左
一支以武山爲岸武山亦謂之南山山前水深
洋船出入皆由於此此第二重門戶也由橫檔
再進五里則爲大虎山其西爲小虎山再西則
獅子洋卽由黃埔以進省之路是大小虎山乃
第三重門戶也此外如蕉門蘆灣山三門口新
湧口等處港汊旁出島嶼周迴尙非夷船出入

要津姑不具論以礮臺言之先有橫檔南山兩處均係康熙五十六年所建形勢稍狹嘉慶五年於沙角添建礮臺一座二十年復就橫檔礮臺加築月臺一座又於南山礮臺之西北添建鎮遠礮臺一座各安礮四十位二十三年又於大虎山建礮臺一座安礮三十二位道光十年大角山又添礮臺一座安礮十六位迨十四年冬間提臣關天培到粵適在驅逐夷人唯嘍啤出口之後與前督臣盧坤商議以大角沙角兩

礮臺中隔海面一千數百丈之遠兩邊礮火均恐不能得力只宜作為望臺遇有應行防堵之時放礮報信其南山鎮遠與橫檔二處礮臺形如品字中隔水面三百餘丈礮火可期得力惟南山礮臺地勢過高礮子易於冒過船頂其餘原建牆垛亦俱單薄於道光十五年會摺

奏准將南山礮臺前面環築月臺名為威遠又將鎮遠橫檔大虎各礮臺加築堅厚添鑄七八千斤大礮分別安配並於橫檔背面山麓及對岸

蘆灣山腳續添永安鞏固礮臺二座安礮四十
位二十位不等此十五年以前陸續添建礮臺
之原委也維時提臣關天培即欲於橫檔山前
海面較狹之處創造粗大鐵鍊安根兩岸鐵鍊
之下承以木排木排兩端繫以錨纜有事則橫
絕中流無事則分披海岸如門開闔防堵益嚴
以經費未充前督臣盧坤任內未及辦理鄧廷
楨到後正與關天培商議籌辦旋於十八年夏
間有暎咭喇國夷日嗎咄喻巡船三隻窺探虎

門見海口布置森嚴畏懼竄去復經鄧廷楨與
關天培欽遵

諭旨倍謹脩防以鐵鍊木排實爲阻擋夷船要具察
看威遠鎮遠橫檔各礮臺之間海面較狹安設
排鍊兩道足資堵截惟威遠鎮遠兩礮臺雖同
在武山腳下而相距尙有里餘排鍊既截中流
礮臺尤宜聯絡故又於威遠鎮遠中間添建大
礮臺一座安放大礮六十位以護排鍊而壯聲
威此鄧廷楨等現在

奏辦之情形也茲欽奉

諭旨令臣詳細查察當又移舟至武山橫檔一帶流覽登眺此處本係第二重門戶最見緊嚴其海面自西北量至東南橫寬二百七十餘丈至三百三十餘丈不等所有排鍊兩道西北皆安根於武山腳下其東南則第一道安根於飯籬排之巨石第二道安根於橫檔山腳俱各鑿深石槽以八千斤廢礮橫安槽底外加鐵箍四道上扣鐵鍊四條由四而併爲二由二而併爲一中

間紐合兩頭貫以大鐵鍊八條用大鐵鎖接扣兩邊以便開闔其木排則以大木截齊各長四丈五尺合四根爲一小排穿以橫木二道又以四小排聯成一大排量寬一丈六尺餘寸面底又各夾以橫木六道箱用大小鐵箍三十口第一道安大排三十六排大鍊三百九丈零第二道安大排四十四排大鍊三百七十二丈兩道排鍊相去約九十丈共配鐵錨棕纜二百四十四副並設划船四隻水兵一百二十名管以把總

一二員無事則中間常開以通出入如須防堵則關閉甚速察看木排箍紮堅固鐵鍊煅淬精融開闔亦俱得法其新建礮臺俯臨兩道排鍊正成扼吭之勢平寬六十三丈高一丈四尺五寸臺牆釘椿砌石垛牆礮洞則用三合土築成安礮六十位後圍石牆九十丈高出山巔除兵房望樓官廳軍裝火藥兩庫尙未竣工外其餘均屬完整演試銅鐵大礮礮子均能遠及對岸山根設有不應進口之夷船妄圖闖入雖遇順風

潮湧駕駛如飛一到排鍊之前勢難繞越卽謂夷船堅厚竟能將鐵鍊衝開而越過一層尙有一層阻擋就令都能闖斷亦已羈絆多時各臺礮火連轟豈有不成灰燼之理似此重重布置均極森嚴聞黃埔及十三行出入夷人行舟過此皆凜然生嚴憚心於海防實屬有益惟排鍊日被鹹水泡浸加以潮汐蕩搖卽木大鐵堅亦自不能無損若有寸鐵脫扣一木離簾立刻卽須脩復總使聯成整片百密不任一疎設或遷

就怠延則寸節偶乖卽全局爲之鬆勁查提臣
關天培於排鍊一事久已殫精竭慮寢食以之
而礮臺工程亦時時躬親督造現在文武員弁
皆極認真此後歲脩事宜均須由關天培立定
章程使將備弁兵皆諳成法加以時常操演精
熟則海防長臻鞏固邊釁永可潛消堪以仰慰
聖主塵念瀛壖之至意所有詳細查察情形謹繕摺
據實覆

奏伏乞

皇上聖鑒謹

奏

木之月之正言

使粵奏稿

木之月之正言 乙身卷二

起運開復於十八日承准軍機處咨開內閣奉
上諭前據林則徐等馳奏躉船鴉片盡數呈繳請解
京驗明燒燬當降旨允行本日據御史鄧瀛奏稱
廣東距京程途遼遠所繳煙土為數較多恐委員
稽察難周易啟偷漏抽換之弊等語林則徐等經
朕委任此次查辦粵洋煙土甚屬認真朕斷不疑
其稍有欺飾且長途轉運不無借資民力著無庸
解送來京卽交林則徐鄧廷楨怡良於收繳完竣
後卽在該處督率文武員弁公同查覈目擊燒燬

俾沿海居民及在粵夷人共見共聞咸知震讐該
大臣等唯當仰體朕意覈實稽查斷不准在事員
弁人等稍滋弊混欽此仰見我

皇上於覈實除害之中寓體恤民力之意臣等公同
跪誦欽感難名伏思銷燬煙土弊竇最多必須
在在嚴防庶可免於偷漏緣此物流行已久利
之所在衆庶爭趨道光十七年間臣鄧廷楨
等曾經

奏明奸民向夷船購買鴉片從前每箇價值洋銀

三十餘圓近來止須十六十八圓不等今卽以錢價覈算每箱亦須六百餘圓合計二萬餘箱不下一千數百萬圓之值在守正嫉邪之人不惟糞土棄之且以鳩毒視之而吸食者則竟望而垂涎與販者更欲居爲奇貨若防範稍不嚴密卽百弊爲之叢生_臣等自收繳以來因虎門越在海濱須防奸民覬覦卽先相度堆貯之地計每箱長約三尺高寬半之大房一間纔能堆至四五百箱之數該處民房廟宇均無寬敞可

容不得已合併數所圍築外牆添蓋高棚勾排封貯內派文職正佐十二員分棚看守外派武職十員帶領弁兵一百名晝夜巡邏幸尙不至疎虞至銷燬之方亦復熟籌屢試向來用火銷化拌以桐油其法未嘗不善第訪聞焚過之後必有殘膏餘瀝滲入地中積慣熬煎之人竟能掘地取土十得二三是流毒仍難盡絕_臣等廣諮博採知鴉片最忌者二物一曰鹽鹵一曰石灰凡以煙土煎膏者投以灰鹽卽成渣沫必不

能收合成膏是其相剋之性正可資之以除其
害也然使逐箱煙土皆用灰鹽煮化則鍋竈之
設必須累百盈千誠恐照管不周轉滋偷漏如
其少設又非數月不能銷完茲再四酌商莫若
於海灘高處挑挖兩池輪流浸化其池平鋪石
底縱橫各十五丈餘尺四旁欄椿釘板不令少
有滲漏前面設一涵洞後面通一水溝池岸周
圍廣樹柵欄中設棚廠數座爲文武員弁查視
之所其浸化之法先由溝道車水入池撒鹽成

涵所有箱內煙土逐箇切成四瓣投入涵中泡
浸半日再將整塊燒透石灰紛紛拋下頃刻便
如湯沸不爨自燃復雇人夫多名各執鐵鋤木
爬立於跳板之上往來翻截務使顆粒悉化俟
至退潮時候啟放涵洞隨浪送出大洋並用清
水刷滌池底不任涓滴留餘若甲日第一池尙
未刷清乙日使用第二池其泡浸翻截悉如前
法如此輪流替換每化一池必清一池之底始
免套搭牽混滋生弊端至嚮晦停工卽將池岸

四圍柵欄全行封鎖派令文武員弁周歷巡綽
粵東天氣炎熱所用人夫僅穿短袴上身下腳
向俱赤露又於停工放出時與執事工役一同
搜檢不許稍有夾帶試行之初每日纔化三四
百箱迨數日後手法漸熟現在日可八九百箱
至千箱不等當其銷鎔之際膿油上湧渣滓下
沈臭穢熏騰不可嚮邇乃悟此物之能蠱人心
志促人年壽槁人形骸者蓋製造時用物取精
別有奇衰方術非僅如內地栽種豐粟刮漿熬

製已也

臣

林則徐駐劄虎門與提

臣

關天培率

同委員候補知府南雄直隸州知州余保純等

逐加佈置隨卽函商

臣

鄧廷楨

臣

怡良以欽奉

諭旨公同目擊銷燬是在省各員理宜輪流到虎查

覈看視

臣

怡良因前次銷燬時商明留省此次

輪應先到虎門

臣

鄧廷楨於

臣

怡良回省後亦

卽乘舟來虎並令藩司熊常醇臬司喬用遷運

司陳嘉樹糧道王篤四員分班輪往接替查視

又咨會廣州將軍

臣

德克金布左翼副都統

臣

奕湘右翼副都統_臣英隆亦各輪流到虎稽查
彈壓粵海關監督_臣豫堃則以虎門本有稅口
更應常川到彼照料稽查在事員弁人等均各
派定執司互相查覈該處沿海居民觀者如堵
只准在柵欄之外不許混入廠中以杜偷漏其
上省下澳夷人經過口門率皆遠觀而不敢褻
翫察其情狀似有羞惡之良胥賴
聖主德威俾中外咸知震聳從此洗心革面庶幾咸
與維新矣至煙土名色亦有不同其黑者曰公

斑土聞係上等之煙白土次之金花土又次之
此次劈箱銷化當將各色煙土分別編號登記
大抵公土白土居多金花土不及百分之一業
已逐箱過秤並口袋所裝者亦皆扣除箱袋覈
實淨煙斤兩計自四月二十二日起截至五月
初三日已銷過八千三百二十箱又二千一百
一十九袋其斤兩共合一百十二萬八千七百
二十九斤以全數覈之所化已將及半現仍趕
緊銷化不敢草率亦不敢遷延恐塵

聖懷謹將現辦情形合詞恭摺具

奏伏乞

皇上聖鑒謹

奏

奏參因循不振之鎮將分別勒休降補摺

奏為粵省南澳洋面甫經清理復有外洋駛到夷

船任其停泊累日應將因循不振之鎮將請

旨分別勒休降補以示懲儆恭摺

奏祈

聖鑒事竊照粵省海洋向分中東西三路中路自老

萬山以內如九洲伶仃等洋皆各國夷商來粵

貿易准其行船之路寄碇聚泊歲以為常若西

路之高廉雷瓊東路之潮州南澳皆夷船例不

應到之區前因南澳鎮所轄長山尾等洋屢有
夷船游奕經臣鄧廷楨節次

奏明檄飭該鎮統帶舟師聯踪堵截追臣林則徐

到粵後會同收繳中路躉船鴉片辦理已能應

手因卽乘勢清理東路責令暎咭喇國領事義

律將分往南澳各船召回中路虎門一體呈繳

煙土旋有佛囉吐船啤叻咭船離船等自南澳

駛來繳煙亦經會摺奏蒙

聖鑒在案臣等正冀閩粵洋面一律肅清第慮南風

司令有自外國新來夷船探知中路查辦甚嚴

恐被勒繳煙土逕從外洋潛竄東路一帶寄棧

售私亟須加意嚴防杜其竄越又念閩省迤北

各洋或尚有夷船游奕一經該省驅逐自必仍

回粵境南澳一鎮最為閩粵兩省關鍵若此時

稍一鬆勁則後來又恐蔓延是以會札疊飭南

澳鎮總兵沈鎮邦親帶舟師配足弁兵礮械堵

截外洋來船並備火攻船隻隨幫聽用又撥通

事隨往如遇閩洋夷船竄回卽諭令呈繳煙土

林文忠公文書 卷三 使粵奏稿

林文忠公文書 卷三 使粵奏稿

若諭之不從且驅之不去竟須示以兵威倘此
後再有夷船累日停留定行特參去後詎該鎮
於四月初十日來稟轉據署參將謝國泰稟稱
三月二十六日有雙桅夷船一隻由西南外洋
駛至長山尾寄碇謝國泰卽同通事引水赴夷
船諭繳煙土據稱船內無煙因風雨阻隔至四
月初一日向東南而去等語維時該鎮往巡聞
洋布袋澳等處於初七日旋抵粵洋初九日復
見長山尾有夷船一隻向東南遠颺等情臣等

接閱之下殊深詫異查夷船自西南外洋駛至
明係外國新來之船並非由閩省北洋竄回澳
境如果並無煙土希圖銷售情弊該處非夷船
應到之地赴彼何爲乃謝國泰旣不能令其繳
土又不能立卽驅行任其以風雨爲詞自三月
二十六日起泊至四月初一日始據報開實屬
縱容疲玩該鎮沈鎮邦雖經暫往別洋而長山
尾爲該轄要地一任夷船累日寄泊是事前防
範已疎至初九日長山尾再見之船係在該鎮

折回以後究竟該船從何駛至未據報明顯係
初一日報開之船未經遠去仍在長山尾一帶
逗留沈鎮邦一味因循含糊飾稟若不嚴參示
儆是南澳一帶前船雖已押回繳土而後船又
復踵至售私藏垢納汙伊於胡底查署海門營
參將水師提標左營遊擊謝國泰年力就衰巡
防漸懈相應請

旨勒令休致其南澳鎮總兵沈鎮邦於兩省交界洋
面莫展一籌難勝水師專閫之任惟年力正強
操舟亦熟尙不至於廢棄可否請

旨降爲遊擊都司以示懲儆仍留粵省水師酌量補
用並令隨船出洋以觀後效其所遺南澳鎮總
兵員缺緊要並請

旨迅賜簡放以重職守是否有當臣等謹會同廣東
水師提督臣關天培合詞恭摺具

奏伏乞

皇上聖鑒訓示謹

奏

附奏東西各洋越竄夷船嚴行懲辦片

再臣等察訪夷情因知外國商船來粵貿易者必先該國請領牌照經過夷埠俱須驗明並於開船之時頒給禁約條款諄諭不許在於中華滋生事端酌限往返程期如未領牌照擅自行船查出卽治其罪船亦充公是外夷禁令森然並非縱其所如漫不加察而商船載來貨物動值數十萬金彼既愛惜重貲自必懍遵法度故貨船到粵必皆報關候驗納稅投行雖近年

以來每有夷商夾帶鴉片情弊要亦先向躉船寄頓始敢駛進黃埔斷無駕駛重船東奔西竄之理惟因獲利太厚販運愈多各國雖閒有之而以港腳一處爲尤甚港腳地名曰唛囉喇曰唛嘑曰慢啞喇囉皆爲映咕喇所屬之港口卽華言所謂馬頭也距映咕喇本國尚有兩月路程而其來至內地則比映夷爲近奸夷利慾熏心罔顧厲禁往往由外洋乘風竄駛越過廣東中路直趨東路之南澳以達閩浙各洋來去頻仍便成熟游之地在

天朝彌綸廣大無不徧示懷柔卽其所不應至之處違禁頻來亦惟自謹修防其究至於驅逐而止奸夷習知其故相率效尤沿海文武員弁不諳夷情震於映咕喇之名而實不知其來歷遇有夷船駛至不過循例催行如其任催罔應亦卽莫敢誰何甚有桀驁夷船膽敢以槍礮相恐嚇而官船因未奉有明文轉不便擅用火器如道光十四年閩浙總督臣程祖洛所奏情節曾奉

諭旨飭令督撫等務當隨時體察情形以靖洋面等
因欽此欽遵在案以臣等近日訪聞乃知此等
奸夷並未領照經商而敢偷渡越竄若被該國
查出在夷法亦必處以重刑况

天朝禁令森嚴豈有轉以內地各洋爲其逋逃藪之
理且如內地奸民出海潛赴夷洋滋事揆諸
國法正宜按例治罪倘在外已被夷人戕害適足
蔽辜豈尙聽其鳴冤許爲報復乎以此對觀互
證度勢揆情愈知越竄之夷船不必空言驅逐

惟有嚴行懲辦乃可震懾其心總之有牌照而
行中路者則爲經商之船無牌照而竄東西各
路者卽爲偷渡之船經商之船尙須區分良莠
偷渡之船明係有莠無良槍擊礮轟皆其自取
似不爲過且此等越竄船隻小者爲三板夷划
大者亦不過雙桅夾板迴非貨船躉船高大堅
厚之比卽船內礮械亦極有限甚至安假礮於
船旁畫礮眼於艙板祇以虛張聲勢粉飾觀瞻
師船果能奮勇剿除何患不能相敵卽云夷人

乃亡命之徒官兵不值與之對仗亦尙有便利之法可操勝算祇須雇募沿海之善泅者多駕拖船滿載車薪備帶火器分爲數隊占住上風漏夜乘流縱放卽或前隊未能得手後隊絡繹復來夷船中觸處皆引火之物未有不可以焦爛者此令一行不待實有其事而奸夷先已膽落似亦懾服之一法也臣等爲杜絕鴉片肅清海洋起見是否有當謹附片瀝陳伏祈

聖鑒訓示謹

奏

會奏銷化煙土一律完竣摺

奏為虎門銷化煙土公同覈實稽查現已一律完

竣恭摺奏祈

聖鑒事竊臣等欽遵

諭旨將夷船繳到煙土二萬餘箱在粵銷燬所有覈

實杜弊並會督文武大員公同目擊情形已於

五月初三日銷化及半之時先行恭摺會

奏在案嗣是仍照前法劈箱過秤將煙土切碎拋

入石池泡以鹽滷爛以石灰統俟戳化成渣於

林文忠公政書

卷三

使粵奏稿

七

退潮時送出大海臣等會督文武員弁逐日到廠看視稽查其間非無人夫乘機圖竊而執事員弁多人留神偵察是以當場拏獲之犯前後共有十餘名均卽立予嚴行懲治並有賊匪於貯煙處所乘夜爬牆鑿箱偷土亦經內外看守各員弁巡獲破案現在發司嚴審尤當按律重辦其遠近民人來廠觀看者端節前後愈見其多無不肅然懍畏並有味喇嚙國之夷商嚙與喇哈咬哢嚙等攜帶眷口由澳門乘坐三板向

沙角守口之水師提標游擊羊英科遞稟求許入棚瞻視臣等先因欽奉

諭旨准令在粵夷人共見共聞咸知震警曾經出示曉諭是以該夷等遵諭前來且查夷商嚙等平素係作正經買賣不販鴉片人所共知因准派員帶赴池旁使其看明切土搗爛及撒鹽燃灰諸法該夷人等咸知一一點頭且皆時時掩鼻旋至臣等廠前摘帽斂手似以表其畏服之誠當令通事傳諭該夷等以現在

天朝禁絕鴉片新例極嚴不但爾等素不販賣之人
永遠不可夾帶更須傳諭各國夷人從此專作
正經貿易獲利無窮萬不可冒禁營私自投法
網該夷人等傾耳敬聽俯首輸誠察其情形頗
知傾心向化隨卽公同賞給食物歡欣祇頌而
去至_臣等前

奏烟土名色本有三種曰公斑曰白土曰金花迨
後復經劈出原箱另有一種小公斑每箱貯八
十箇其式樣比行常之公斑較小而箇數倍之
故每箱斤兩不相上下每箇用洋布包裹製造
亦較精緻訪聞此種在外國係最上之煙價值
極貴是現在所化煙土竟有四種_臣等近日於
邸鈔中伏讀

上諭煙膏煙具多有假造其弊不可勝言等因欽此
仰見

聖明務求真實力戒欺朦之至意_臣等愚昧之見欲
辨其僞必須先識其真未知近時各處所挈獲
者皆係何種煙土若以外夷原箱之物互相比

較則真偽似可立辨不至混淆謹將現在四種
煙土每種各留兩箱可否即將此八箱作為樣
士如蒙

准令解京卽委便員搭解並不費事倘亦無須解送
則此時粵東每月俱有各屬挈獲解省驗燬之
煙亦可隨同銷化現除暫存此八箱外計已化
煙土湊合前奏之數共有一萬九千一百七十
九箱二千一百一十九袋其斤兩除去箱袋實
共二百三十七萬六千二百五十四斤截至五

月十五日業已銷化全完斯時蕩穢滌瑕幸免
毒流於四海此後除奸拯溺尤期約立於三章
庶幾仰副我

聖主除害保民之至意所有銷化煙土完竣緣由
等謹會同水師提督臣關天培粵海關監督臣
豫堃合詞恭摺具

奏伏乞

皇上聖鑒訓示再虎門現在無事臣林則徐亦暫回
省城商辦一切合併聲明謹

奏

會奏夷船互市情形並空躉開行隻數摺

奏爲彙報外夷貨船往來互市情形並回空躉船

開行隻數恭摺奏祈

聖鑒事竊臣等前奏收繳夷船鴉片欽奉

諭旨各國夷商業經遵繳煙土自應加恩准予照常

互市以示懷柔等因欽此臣等當卽恭錄咨會粵

海關監督臣豫堃一體欽遵辦理惟因外國新

來貨船開行在數月之前恐尙未知嚴禁仍帶

煙土且查向來積弊夷商所帶之土皆於到後

卸在伶仃等洋之躉船然後進口是未進口以前應先設法稽查以杜私卸臣等會飭署澳門同知蔣立昂暨香山協副將惠昌燿等查照糧船勾水之法將新到各貨船吸水尺寸先用丈杆自水面量至艙面註明印單粘於夷船船艙以爲記認仍造冊報明以俟進口時覆驗水跡有無浮高即可辨其有無私卸復咨會海關監督親至黃埔將貨船逐一盤驗如有夾帶自必不能藏掩隨有味喇啞國之吻喇喇船噤咬船

嚙船啖喇船噉咬船噴咬船哧啞船叫噸船可啫船共九隻販運洋米棉花洋布黑鉛等貨均於量明水誌之後進口查驗俱無夾帶鴉片並有帶來買貨洋錢十五萬數千圓據通事等稱夷船攜帶洋錢近年頗爲罕見尤可爲不賣鴉片之明證此外有味喇啞國之兜喇一船噉咭喇所屬港腳之啞喇一船於勾水之後不敢進口旋即駛向老萬山外徑行回國其爲帶有鴉片無從覓售又恐覆驗水痕不能卸載是以潛

逃回去情事顯然但既未流毒中華卽不便窮追肇釁此新來貨船之情形也其原泊黃埔夷船滿載內地貨物出口者計港腳則有啞咄咄等十五船咪喇啞國則有嘆嚙云等八船共船二十三隻亦皆先後乘風駛出老萬山此又內地貨物照常通往外國之情形也至已經繳清煙土之躉船自應驅逐回國臣等於收土後傳諭領事義律早爲遣回茲查港腳之喊喇船噉啞船吧咄喇船噉啡喱船噉船咪喇啞之啊吧

船小呂宋之喇船共七隻已先後駛出老萬山回國其餘有候修船者有候帶貨壓載者並有其船業已破爛不能衝風破浪難以回國擬折賣與人者臣等分別覆查尙皆實情除仍分飭師船嚴加防範並不時查催驅逐外現在洋面澳門均屬安靜所有貨船往來互市情形及躉船回國隻數臣等謹會同粵海關監督臣豫堃合詞恭摺具

奏伏祈

皇上聖鑒謹

奏

會奏續獲人煙槍具摺

奏為粵東查辦鴉片續獲人煙槍具覈實確數恭

摺具

奏仰祈

聖鑒事竊照鴉片之毒比於砒鴆然世之死於砒鴆者千萬人而一耳若鴉片則吸食者病於癮而死與販者罹於法而亦死是死於鴉片者幾於十人而一於此而不併力掃除貽害伊於胡底言之切齒思之寒心臣鄧廷楨臣怡良既疊奉

林文忠公政書

卷三

使粵奏稿

林文忠公政書

卷三

使粵奏稿

三

諭旨嚴飭查拏刻圖滌蕩追臣林則徐仰承

巽命來粵查辦海口事宜以大患務當力祛不敢稍存畛域除起獲夷船煙土以清來源外又經會同切劄各屬文武隨時隨地悉力搜拏以冀濁流漸息游自臣鄧廷楨臣怡良節次

奏報至本年三月底止計共獲人犯一千六百名煙土煙膏四十六萬一千五百二十六兩九錢八分煙槍四萬二千七百四十一枝煙鍋二百一十二口及煙具等件均經仰蒙

聖鑒在案臣等伏思吸食者雖善於諱匿固販者雖巧於收藏而鬼蜮情形斷難掩其鄉鄰耳目因復通飭各屬逐鄉選舉公正紳士議立族黨正副挨次編查保甲使之保良攻匪有犯卽擒茲自四月初一日起至五月十八日止據各屬文武先後報獲煙案一百四十起販賣煎熬吸食人犯共一百九十二名煙土一萬二千七百七十三兩七錢九分煙膏二百一十二兩五錢八分五釐煙槍一千二百四十五枝煙鍋三十六

口又陸續撈獲煙泥二百六十四兩二錢煙膏
一十六兩六錢六分煙槍二百四十三枝煙鍋
一口又民間首繳槍煙一項臣鄧廷楨臣怡良
於未經接奉

硃批飭令酌覈之先據各屬稟報收繳煙土一十六
萬九千三百零七兩五錢五分煙膏四千六百
零五兩零二分煙槍二萬六千零五十枝煙鍋
三百一十六口綜計煙土煙膏共重一十八萬
七千一百七十九兩八錢零五釐煙槍二萬七

千五百三十八枝煙鍋三百五十三口犯經隨
時發司嚴審如係遠道情輕人犯卽飭該管府
縣究詳分別懲辦報獲槍煙等件因雷瓊二府
離省寫遠或僻在海南計其獲數無多飭卽就
近解道確驗燒燬具報其潮州一府道里雖亦
迢遙惟所獲大起實多數居通省十之八九多
則真僞易淆而抽換偷漏之弊恐亦在所不免
是以飭令與附近各府廳州均將煙槍一體解
省由臣等親率司道營員眼同驗明彙燒以歸

覈實而絕濛混伏查粵東地處海濱番舶絡繹
 匪徒趨利若鶩軌法營私較他省為多亦較他
 省為易當茲查辦喫緊未嘗無怵心悔禍之人
 而嗜痂者以腐臭為神奇牟利者視士囊為金
 穴若不持以定力盡絕萌芽不但疇昔之藏乘
 間復出吹吸之輩饒吻重張且恐外夷窺伺鉗
 網之疎仍肆浸淫之計前功可惜痼疾安瘳臣
 等惟有協力同心督屬勉益加勉根株一日未
 淨即購捕不容一日或疎必使舊染胥蠲以仰

副我

聖主崇德好生除惡務盡之至意除再通飭各屬文
 武員弁奮力查拏務將開密設館販賣吸食各
 匪犯多方弋獲煙土實力窮搜不許支飾畏難
 稍涉縱漏外所有續獲人煙槍具緣由臣等謹
 合詞恭摺具

奏伏乞

皇上聖鑒訓示謹

奏

嚴明訓飭感懷交深臣恭繹

聖諭所指收繳之弊約有三端一則恐以挈獲之犯作為自首希圖減罪也一則既繳之後官不復查聽其吸食也一則地方官塞責邀功假造煙膏煙具以滋朦混也凡此三弊皆臣所切齒痛恨矢以極力掃除者茲蒙

訓諭提撕彌欽覈實從嚴之

至意敢不倍加釐剔務絕根株惟是濱海愚民無知誤會近日紛紛傳播轉謂煙禁已弛有槍有土

仍聽存留前此赴鄉查訪之紳耆輒被鄉民恃頑抗阻謂已奉

旨免繳何得多事此等藉詞搖惑以嚴為寬實屬詐妄之尤亟宜痛加懲創除嚴挈重辦外惟念臣等所辦收繳之法並非合罪人自行投首官不復查亦不敢聽州縣塞責邀功假造朦混伏求皇上恕臣愚昧容其據實瀝陳查鴉片久已盛行廣東尤甚所謂遍地皆是早在

聖明洞鑒之中即使此後外夷斷絕來源正恐內地

國積之多數年用之不能盡在臣與督撫臣等盡力督拏無日不有獲犯起賊然察看向來陷溺之深與到處窩藏之密地方遼闊民俗兇頑島澳既不可勝窮胥役又大都難恃是卽設法拏獲亦祇千百中之什一如必掃數拏盡竊恐遙遙無期因思保甲之行本係詰奸良法每鄉總有公正紳士良善者民五家十家之間耳目最爲切近與販吸食斷難瞞其鄰人故保甲有五家連坐之條在官者因卽藉以儆衆如一家

有犯責四家以告發否則與之同罪而爲鄰右者旣知其人有犯恐必連累及身又念比屋相親不忍遽寘於法則必多方勸戒悚惕而禁止之並取其煙槍膏土彙繳於官官則驗明卽收並不詰其姓名來歷蓋明以留其廉恥而實則杜其避趨故第收之於例應舉發之族鄰而不收之於律許減輕之罪犯猶恐不實不盡一面購線查拏有犯卽懲其於何人曾繳何人未繳拏者本不過問犯者無可藉詞此所以不相妨

而適相濟也夫有鴉片卽有吸食勢所必然在官多一分之收卽在民少一分之食誠能減之又減以至於無似亦有益無損之事且吸食之人其畏收繳轉甚於畏查拏蓋查拏不能無漏網況父兄溺愛親族礙情雖恨子弟之吸煙而恐其到官問罪轉必多方爲之隱瞞有收繳之一途則凡家人骨肉戚友鄉鄰平日勸之不從者至此皆得悚以

功令之嚴奪其物以祛所嗜是一人之癮衆人斷之旣立死罪以懾其心復飭收繳以去其疾迫之以不得不斷之勢正所謂以生道殺民而比閭族黨間變化愧厲之方備焉保受和親之俗成焉故報繳者雖見其多並無公然免罪之犯而報獲者並行不悖實無繳後不查之人蓋以保甲禁鴉片而寓收繳於編查猶之以保甲查教匪卽應收其經卷以保甲治械鬪卽應收其器械其理一也至假造之弊惟不驗乃至被朦果其驗之則真僞判然難逃衆目故煙士必用

刀剖開煙膏必以火燃試不惟全假者即時發覺卽攪和者亦立見區分若煙槍則外面一觀已有生熟之別又劈破以視其內必其煙油久漬乃爲舊槍卽新槍尙不能相混而他物所假更無論矣現在粵省所收膏土槍具惟僻遠隔海之雷瓊二屬爲數本少免令解省外其餘各屬悉經通飭解驗且不獨收繳者當驗而挈獲者更當驗蓋收繳無功可見惟挈獲始足見功地方官如存邀功之心則與其假造而報收繳

不如假造而報挈獲之爲得也夫以粵省作偽之風命案尙有頂兇盜案亦有買犯要在上司認真乃不受其朦蔽耳況鴉片獲利最厚弊竇最多有賣放正犯真贓而以從犯假贓報獲者有獲時明係真贓而侵吞偷換解時變作假贓者詐偽叢生何所不至然旣不能因查挈之有偽遂並查挈而停止之則收繳中之真假或亦責成臣與鄧廷楨等逐一調驗如有假造惟臣等是問且查粵省自上年以來未曾於鴉片案

內保舉一員是既不使邀功安敢聽其朦混臣到粵以後疊准鄧廷楨等將解省之煙土等物移同查驗聞有一二攙和之膏土搪塞之新槍皆必剔出發司澈底究辦此後更當責成地方官先自劈驗再行封解如有不實即將該州縣嚴參示儆又如煙槍一物臣始亦以爲不過如尋常之煙桿耳斷癮與否於槍何與迨屢獲煙犯細加研訊始知溺於鴉片之人直以其槍爲性命緣新槍不能過癮總須平素用熟有煙油

久清其中者方能適口故一槍有值數十金百餘金者甚至父子兄弟間不肯相假其陷溺之深如是所以欲去其癮先去其槍有如理髮而奪其櫛作字而奪其筆雖酷嗜者亦無可如何非第使之明志也謹查

大清律例內禁止賭博必並賭具而嚴禁之蓋有具則有賭無具卽無以爲賭也煙之需槍恐或類是臣前於邸鈔中見有被罪圈禁而仍羣聚吸煙者是因破案而不收槍之故若不收槍則未

犯案者固難望其自燬卽已犯案者仍不甘於
棄槍將使在家獨吸之人合之而同吸於囹圄
並將各處散吸之人徙之而聚吸於配所竊恐
輾轉流傳其勢更難於禁止矣凡人不見可欲
則心不動煙入於目槍入於手欲其口之不饒
不可得也吸旱煙者若無煙桿亦有不能不歇
之勢然旱煙之新桿尙可將就而鴉片之新槍
與無槍同由此觀之收槍之法或亦禁煙者所
不廢耳至自首一節現在粵省固無其事而

大清律例明有此條除殺人不准首外小而尋常罪
犯大而習教爲盜尙皆准首設有人煙癮已斷
本身出首察看得實似亦只得遵例辦理未便
竟不准首致與定例兩歧而與怙惡不悛之人
亦無區別惟流弊必須嚴杜尙州縣將挈獲之
犯捏爲投首定當以故出人罪嚴行參辦而罪
人首後復犯似宜卽照新例定罪不得仍與初
犯者同科始足以昭警戒伏念我
皇上明罰勅法因恐臣工不知振作是以

訓飭加嚴而無知蚩氓相率傳訛轉幸

明諭之頒冀遂深藏之術若因此頓更大局非獨前
功可惜更虞挽救無方且風聞外夷於呈繳之
後知內地民人煙可不繳不無反唇相稽者於
國體尤有關係臣仰蒙

委任專辦此事下懷實深焦急不揣冒昧披瀝密陳
如臣言謬妄難行應請

皇上破其顛愚示以懲儆倘蒙

俯念臣心無他惟冀於公有濟可否

特頒申諭將

前旨係爲覈實查辦正以從嚴之處明白宣示嗣後
寓收繳於保甲責大吏以督查如有州縣以挈
作首以假混真不行嚴參者事發以徇庇論而
總不得藉口希圖免繳俾天下臣民憬然領悟
庶久藏之毒物漸收獲以無遺頂感

鴻慈倍無旣極再督臣鄧廷楨與臣籌議意見相同
因接奉

硃批令其酌覈亦已自行另片覆

林文忠公政書

卷四

使粵奏稿

三

奏惟係專差齎遞恐到京在臣此摺之後合併聲

明伏祈

聖鑒訓示謹

奏

會奏擬具檄諭暎咭喇國王底稿恭候

欽定摺

奏為遵

旨擬具檄諭暎咭喇國王底稿恭呈

御覽仰祈

欽定事竊臣林則徐上年在京

陛見面奏禁止鴉片一事擬頒發檄諭曉示外夷容

俟到粵與督臣鄧廷楨等酌商奏請

訓示迨到粵之後節次欽奉

林文忠公政書心集使粵奏稿

上諭著與鄧廷楨商酌妥擬底稿具奏經朕披覽再行頒發等因欽此維時_臣等諭令在粵之啖咭喇國領事義律及住省各夷人呈繳躉船鴉片辦理正屬應手因思外國重洋遙隔尙可暫緩檄行當將就近諭夷緣由合詞附片覆

奏嗣奉

上諭啖咭喇既有在粵領事及住省夷人經該大臣等就近諭知辦理應手所有檄諭該國之處亦著暫緩頒行統俟議定與販吸食各罪名頒行新例

時於善後章程內另行詳細籌議仍遵前旨擬稿進呈再行頒發欽此仰見

聖主因時制宜周詳

指示之至意_臣等曷勝欽感茲新例業已頒到所有

內地興販吸食並夷人夾帶鴉片各罪名均經

議定因查粵省成案凡欽奉

諭旨事涉外夷者大都由督撫_臣聯銜照會該國王

欽遵辦理此次既頒新例自應宣示重洋咸使

懷

德畏

威遷善遠罪除一切善後章程容俟詳細籌議另

奏外所有檄諭外國之稿應先酌擬進呈唯查各

國夷船來至粵東者如西洋夷人久住澳門幾

成土著自可就近給諭毋庸遠寄出洋其嘒嘒

嘒嘒大小呂宋雙鷹單鷹噠國喘國近年買

賣較稀惟啖咭喇之船最多咪喇啞次之但咪

喇啞並無國主只分置二十四處頭人礙難遍

行傳檄啖咭喇國現係女主年紀亦輕然聞號

令係其所出則該國似宜先頒檄諭臣等不揣

閭陋謹會同商擬底稿另摺恭錄進

呈伏祈

聖鑒折衷俾有體要敬候

欽定發回之後再議頒發其餘各國俱先諭知在粵

夷目夷商倘該夷目等稟請移知其國王然後

奏明酌發是否有當臣等謹合詞恭摺具

奏伏乞

皇上聖鑒訓示謹

林文忠公政書

二集

使粵奏稿

三

奏

擬諭暎咭喇國王檄
謹擬頒發檄諭暎咭喇國王底稿恭候

欽定

為照會事洪惟我

大皇帝撫綏中外一視同仁利則與天下公之害則
為天下去之蓋以天地之心為心也貴國王累
世相傳皆稱恭順觀歷次進貢表文云凡本國
人到中國貿易均蒙

大皇帝一體公平恩待等語竊喜貴國王深明大義

感激

天恩是以

天朝柔遠綏懷倍加優禮貿易之利垂二百年該國所由以富庶稱者賴有此也唯是通商已久衆夷良莠不齊遂有夾帶鴉片誘惑華民以致毒流各省者似此但知利己不顧害人乃天理所不容人情所共憤

大皇帝聞而震怒

特遣本大臣來至廣東與本

總督部堂巡撫部院

會同查辦凡

內地民人販鴉片食鴉片者皆應處死若追究夷人歷年販賣之罪則其貽害深而攬利重本爲法所當誅惟念衆夷尙知悔罪乞誠將躉船鴉片二萬二百八十三箱由領事官義律稟請繳收全行燬化疊經本大臣等據實具奏幸蒙大皇帝格外施恩以自首者情尙可原姑寬免罪再犯者法難屢貸立定新章諒貴國王嚮化傾心定能諭令衆夷兢兢奉法但必曉以利害乃知天朝法度斷不可以不懍遵也查該國距內地六七

萬里而夷船爭來貿易者爲獲利之厚故耳以中國之利利外夷是夷人所獲之厚利皆從華民分去豈有反以毒物害華民之理卽夷人未必有心爲害而貪利之極不顧害人試問天良安在聞該國禁食鴉片甚嚴是固明知鴉片之爲害也既不使爲害於該國則他國尙不可移害況中國乎中國所行於外國者無一非利人之物利於食利於用並利於轉賣皆利也中國曾有一物爲害外國否況如茶葉大黃外國所

不可一日無也中國若靳其利而不恤其害則夷人何以爲生又外國之呢羽嗶嘰非得中國絲斤不能成織若中國亦靳其利夷人何利可圖其餘食物白糖料薑桂而外用物自綢緞磁器而外外國所必需者曷可勝數而外來之物皆不過以供玩好可有可無旣非中國要需何難閉關絕市乃

天朝於茶絲諸貨悉任其販運流通絕不靳惜無他利與天下公之也該國帶去內地貨物不特自

資食用且得以分售各國獲利三倍卽不賣鴉片而其三倍之利自在何忍更以害人之物恣無厭之求乎設使別國有人販鴉片至暎國誘人買食當亦貴國王所深惡而痛絕之也向聞貴國王存心仁厚自不肯以已所不欲者施之於人並聞來粵之船皆經頒給條約有不許攜帶禁物之語是貴國王之政令本屬嚴明祇因商船衆多前此或未加察今行文照會明知天朝禁令之嚴定必使之不敢再犯且聞貴國王所

都之喇嚨及嘶噶喇噶等處本皆不產鴉片惟所轄印度地方如唎喇慢噠喇嚨唎唎噠嚨喇嚨喇嚨等處連山栽種開池製造累月經年以厚其毒臭穢上達天怒神恫貴國王誠能於此等處拔盡根株盡鋤其地改種五穀有敢再圖種造鴉片者重治其罪此真興利除害之大仁政天所佑而神所福延年壽長子孫必在此舉矣至夷商來至內地飲食居處無非天朝之恩膏積聚豐盈無非

天朝之樂利其在該國之日猶少而在粵東之日轉多弼教明刑古今通義譬如別國人到暎國貿易尙須遵暎國法度況

天朝乎今定華民之例賣鴉片者死食者亦死試思夷人若無鴉片帶來則華民何由轉賣何由吸食是奸夷實陷華民於死豈能獨予以生被害人一命者尙須以命抵之況鴉片之害人豈止一命已乎故新例於帶鴉片來內地之夷人定以斬絞之罪所謂爲天下去害者此也復查本

年二月間據該國領事義律以鴉片禁令森嚴稟求寬限凡印度港脚屬地請限五月暎國本地請限十月然後卽以新例遵行等語今本大臣等奏蒙

大皇帝格外天恩倍加體恤凡在一年六箇月之內悞帶鴉片但能自首全繳者免其治罪若過此限期仍有帶來則是明知故犯卽行正法斷不寬宥可謂仁之至義之盡矣我

天朝君臨萬國儘有不測神威然不忍不教而誅故

特明宣定例該國夷商欲圖長久貿易必當懍
遵憲典將鴉片永斷來源切勿以身試法王其
詰奸除慝以保乂爾有邦益昭恭順之忱共享
太平之福幸甚幸甚接到此文之後即將杜絕
鴉片緣由速行移覆切勿諉延須至照會者

